




Tir Yimiyim



Russia election nung minprongra temerenshi agütsütsü: Putin



India vs South Africa: Shami Test series masayatetsü

Regd. No. RNI. NAGAAO/2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

VOL. XXI NO. 70 (ADOK 70) DIMAPUR AMUNGNÜ (SUNDAY) LUCHII (DECEMBER) 17, 2023 ₹ 5.00

Public Accounts Committee, NLA senden amentsü

Dimapur, December 16, 2023 (TYO): December 20, 2023 nü Public Accounts Committee, NLA indang Oral Evidence Meeting amentsü metetdaksüogo.

Anepdang 11:00 ako nungi senden amentsü ta MLA aser Committee on Public Accounts Chairman Mhathung Yanthan-ishi.

Comptroller and Auditor

General of India indang 2019-2020 financial year Report nung shia aliba ama Government Department indang Audit para(s) iba senden nung benoka jembitsü. Anungji Administrative Head of Department (AHOD) aser Head of Department (HOD) ajaki committee tsüngdang tebang kuli ashitsü atema arutsü metetdaksür ta Chairman Mhathung Yanthan-isha.

Village Adoption Committee-i P Khel adopt asü

Kohima, December 16, 2023 (TYO): Honibarnü Kohima Village kübok P Khel Council Hall nung Pfuchatsumia Khel adoption sentong ka agiogo.

Iba sentong ya 10-Northern Angami-I Assembly Constituency nung Village Adoption Committee (VAC) kübok agi.

“Department ajaki VAC nung shilem ka ama P Khel Council den külemi yaritepa aotsü imlar kechiyong Kohima Village nung khel kaji tanga yimtsüng aika dang nungi tuluba lir” ta local MLA aser School Education & SCERT Advisor Dr Kekhrielhoulie Yhome-ishi.

“Kohima Village ya state yimtiba nung shilem ka lir aser Civil Secretariat anasa lir saka sorkar schemes aika mangur. VAC ya küm 10 tejakdang tenzükaka P. Khel nung tang ang iba mapa tenzük aser kobi melii Kohima Village kübok khel asem nunga inyaka aotsü imlar” ta Dr. Yhome-ishi.

P Khel Council-isa nija mapa dang nungi Khel renloksü mapa atema temulung agüja inyaka aruba atema tenüngsang agütsür ta paisa shisem.

Iba sentong nung Dr. Yhome-i P Khel Council nem tractor ka,

power tillers 3 aser grass cutters 2 agütsü.

P Khel atema iba mapatong kübok department 10 longjemr inyaksü anungji P Khel Council-i maparen takok ngua inyaksü atema yariteptsü mepishir ta EAC & Convener VAC Dr Riku Khutso-ishi.

VAC-i Council den asüngdangtepa action plan ka renemtsü ta paisa ashi.

“Advisor Yhome-i Kohima Village nung VAC kübok P. Khel mezüng adopt asüba atema kanga pelar. Rural Development Department ajanga P Khel Council nem agri farm machinery agütsüba atema pelar” ta P. Khel Council chairman Kelhousietuo Rutsa-isha.

Village Adoption Committee nung Kohima Municipal Council Administrator Lanusenla Longkumer, Executive Engineer PHED (Urban) Kohima Neilhoukholie Chielie, Chief Veterinary Officer Kohima Dr Rokoza Dolie, Functional Manager DIC Kohima Jessy Jurry, Assistant Controller LMCP Shiloh Kath, Welfare Inspector of Department of Social Welfare Zahebeituo Kire aser JE in BDO Kohima Imnatuba Jamir nung lir.

Oting Baptist Arogo küm 75 jungogo

Dimapur, December 16, 2023 (TYO): Mon district kübok Oting Baptist Church küm 75 ajungba benjung mongogo. Iba sentong nung Health & Family Welfare Minister P. Paiwang Konyak aden.

“Küm 75 ya arogo ka atema kanga dang tongtipang alizüng ka atongba lir. Asenoki asen arogo küm 75 ajungba benjung amongdang asenoki tamang akaba aser mezüng amangertemi bendanga agütsüba bilemteter. Temeim, aria bilemba aser telongjem tesayubatem nung azüitba bilemteter” ta Minister Paiwang-ishi.

“Küm 75 tejakdang mezüng arogorpurtemi tamang tasen

agizükdang iba mangdang ayu aser tayongzükba jenti ajangeta arur tanü nüboritem nem teimla aser aria bilemba tangatetba agütsüogo” ta pai ashi.

Mezüng arogo tenzükertemi sarasadema, bendanga agüja aser anibelem arema inyakba atema pelar aser parnok nem tetushi agütsür, ta Paiwang-isha.

Paisa arogorpurtemi dang tarutsü dak nükla yur aser tamang akangshir temeim aser taochi osang prokshitsü ayongzük.

Iba sentong nung Tizit area nungi arogo lennirtem, yimtsüng balala nungi Angh tem den tanishirtem aser civil society lennirtem aden.

Nagaland nung auto rickshaw display card system tenzük



Dimapur, December 16, 2023 (TYO): Dimapur, Chümoukedima aser Niuland district tem nung auto rickshaws tip atemtsü atema Dimapur Traffic police-i Honibarnü display card system ka tenzükogo.

Iba inyakyim tasen kübok police-i auto rickshaw indang kulikakettem jangjaba sülen photo identity display card ka agütsütsü. Iba nung auto rickshaw indang temetetsütem aser Traffic/police control room number tem alitsü, ta DCP Traffic Meren Imchen-ishi.

2022 küm den medemdangra Dimapur, Chümoukedima aser

Niuland district tem nung taküm gari lendong 55% agi tajemba atalokogo ta paisa ashi.

Iba system tasenba ya Regional Transport Authority, Dimapur ajanga mulunga agizükogo aser Dimapur o Chümoukedima nung auto rickshaw aika nem photo identity display cards agütsüogo.

Commissioner of Police Dimapur Kevithuto Sophie-i iba sentong tenzüksüdang “system tasenba ajanga passengers lendong nungi kümzuka ayutsü, auto rickshaws auyaba putetsü, permits aser license maliba azüoktsü” ta ashi.

“Auto rickshaw display card

ya küm ana atema alitsü aser iba sülen renewal asütsü. Iba system kübok records ajak digitally anepalua ayutsü aser Deputy commissioner of police (traffic), Dimapur nung mapang shia update asütsü” ta Commissioner of Police-i ashi.

Ketdangsürtemi rickshaw drivers uniform mita repringba nunga police-i yariteptsü ta Sophie-isha.

Dimapur Traffic police-i solar blinkers, traffic assistance booths, traffic islands aser shisaliok reju balala nung road safety awareness programme agiba atema tenüngsang agütsür ta Commissioner of Police-isha.

Myanmar, Bangladesh & Manipur nungi refugee tem yaritsü

Aizawl, December 16, 2023 (Agencies): Sorkari Myanmar, Bangladesh aser Manipur nungi aruba refugee tem maneni yaritsü ta Mizoram chief minister Lalduhoma-ishi.

Myanmar, Bangladesh aser Manipur nungi nisung 40,000 tema Mizoram nung arua jenoka lir.

Mizoram nung chief minister inyaksü tezüngzüktep agiba sülen pai Union Home Minister Amit Shah aser External Affairs

Minister S Jaishankar na den iba tebilemstü onük jembioogo ta Lalduhoma-ishi.

Paisa Delhi-i oa tena den ajurutepa iba onük lemsateptsü aser Centre nungi teyari meshitsü ta ashi.

Iba onük dak sendakba osang lemsatepdang Centre tebilemba temulung nung alitsüla ta paisa shisem.

“Ajisüaka state sorkari parnok yaritsü. Iba ya political masü saka humanitarian tebilemstü ka lir.

Onoki refugee tem jenokdaksütsü aser onok ket nung aliba rongsen agi akokba anepalutsü” ta CM Lalduhoma-ishi.

Myanmar nung 31,300 aser Bangladeshis nung 1,100 tema Mizoram nung jenoka lir.

Külen, taküm May ita Manipur nung kin o kin mepetmesü adokba sülen nisung 12,000 jungnüa Mizoram kübok tesem balala nung jenoka lir.

Arunachal nung taoba MLA Yumsem Matey khaset

Itanagar, December 16, 2023 (Agencies): Honibar nikongdang Arunachal Pradesh nung taoba MLA Yumsem Matey khasetogo.

Taoba MLA Matey ya Tirap district kübok Rahu yimtsüng nung lokti sentong ka nung adendang lanur telok ka arur pa anir ao aser Indo-Myanmar arrtsü anasa khaset ta osang angazük.

Matey ya 2009 nungi 2014 tashi Congress ticket amer Khonsa (West) MLA inyaka liasü aser 2015 küm pa BJP nung aden.



Matey ya Tirap District kübok Ollo kin nungi lir aser par kin nungi mezüngbuba graduate (BA. Hons. in History) liasü. Paisa Changlang District nung District

Adult Education Officer (DAEO) inyakogo.

Sangküm agitsü aliba assembly election nunga pa Khonsa (West) assembly nungi tokteptsüba liasü.

2019 küm Tirap district kübok Bogapani yimtsüng nung telungpurtemi West Khonsa MLA Tirong Aboh den nisung 10 khaset.

Arunachal Pradesh nung Tirap, Longding aser Changlang (TLC) district asem disturbed area kübok lir aser MHA-i AFSPA ozüng benoka lir.

MLA & Advisor Temjenmenba-i par constituency sema senzü



29 Jangpetkong Assembly Constituency semdanga senzüba mapang December 16 nü lokti senden ka nung MLA & Advisor for Transport and Technical Education, Temjenmenba-i o jembiba noksa nung angur.

Dimapur, Luchii/December 16 (Agencies): MLA & Advisor Temjenmenba-i par constituency sema senzüba mapang December 16nü Dibuia yimtsüng semdangogo. 29 Jangpetkong Assembly Constituency nung aliba electorate tem den ajurutepa sensaksemtsü asoshi MLA & Advisor for Transport and Technical Education, Temjenmenba-i par constituency kübok yimtsüng aser unit ajak semdangtsü asoshi sentong ka yanglur inyakdar.

MLA meina state, Mokochung Region, 29 Jangpetkong AC nungi Nationalist Democratic Progressive Party (NDPP) lenirtem, Changki village council aser tanga lenirtem oa liasü.

Iba sentong ya November 29 nü Changki yimtsüng nung sorkar sentong balala indang tangazükba agütsütsü asoshi sentong ka ayongzüka agiba nung shilem ka lir. Hornbill benjung amungba ajanga

mapang tatsüka anena atar December 15 nü tenzüksi aser Honibarnü tembangogo.

Lokti senden balala nung o jembiba mapang MLA & Advisor, Temjenmenba-i, par constituency kübok nüburtem aser yimtsüngtemi parnok tenüng nung nokdaksü atema pa shimba asoshi kanga parnok dang kanga pelaba lemsatapa liasü. Paisa constituency nung terenlok bener arutsü atema ajak longjemer inyaksü ayongzüka liasü.

Pa indang election motto ji tekaratiba nung terenlok bener arutsü asoshi liasü ta shia Temjenmenba-i ashiba agi, ano küm pezü anunga lir aer iba mapang ajak longjemer inyaka terenlok bener arutetsü, ta ashi. Paisa, election mapang pai pa constituency tenüng nungi nokdakba tashibo takok tashi terenlok bener arutsü ta nangzüka indang lephsia jembiba. Iba dak sendakba nung constituency kübok kinük kisang ajak renloka aotsü asoshi nüburtem longjemer

inyaksangshitsü ayongzüka liasü.

Yimtsüngtem semdanga aoba mapang Advisor-i Beneficiaries tem nem lemtsütsü asoshi village council tem nem CMHIS cards tem agüja liasü.

Kasa mapang nung NDPP Nagaland State Working President N. Bendang Jamir-ia, Temjenmenba amala lenir tajung ka shimba atema constituency nem tenügsang agütsü aser ashiba agi, MLA & Advisor ya lokti lenitsü asoshi sempet aliba ajanga ajaki nükshir aser tenügsang agütsür, ta ashi.

Sentong nungsa NDPP Mokochung Region tir Mayangnungba, 29 Jangpetkong AC, tir Aodangnok aser NDPP Mokochung Region Treasurer, Pangerzulu nungeria o tatsütsü jembiba liasü.

Anogo ana tsüngda Advisor aser par team-i Alongkima, Waromung, Dibuia, Mongchen, Chungliyimsen aser Khar yimtsüng semdanga liasü.

National Commission for Karamcharis-i Peren District semdang



National Commission for Safai Kamcharis mendenbuba M. Venkatesan, DC Peren aser tanga ketdangsürtem tangokba noksa nung angur.

Dimapur, Luchii/December 16 (TYO): Peren district atema National Commission for Safai Kamcharis senden National Commission for Safai Karamcharis mendenbuba M. Venkatesan den December 16 nü Deputy Commissioner Conference Hall Peren nung menogo.

Senden nung Deputy Commissioner Peren Vineet

Kumar IAS-i ashiba agi, Safai Karamcharis ya merekmeju maparen balala nung sendaka alir ka lir, kong parnok dak metaloker alirtema densema lir.

Peren DC-isa, safai Karamcharis nükjidongji, nisung teka agi dang scü amala jana nunger intokba raktoktsü aser safai Karamcharis aser parnok dak metaloker alirtem rongsenketzüng jenjang

ajungkettsütsü asoshi lir, ta ashi.

National Commission for Safai Karamcharis-i ashishiba indang telangzüba agütsüba mapang ketdangsür yagi ashiba agi, employee tem indang itasen ya fixed pay basis nung town council revenue nungi agütsür aser mapa inyakerem nem parnok kümzüka toktsütsü atema hand gloves, masks aser Jacket amala agütsür.

Longkong yimtsüng nung Apiary Farm School lapokogo

Dimapur, Luchii/December 16 (TYO): Agricultural Technology Management Agency (ATMA) Mokochung, Chuchuyimlang Block-i December 14 nü Longkong yimtsüng nung Apiary Farm School lapoktsüogo, kong Akumjungba farm school tesayur asütsü.

Farm school lapokba sentong tatsüka agiba mapang Aolemla Kichu, BTM, Chuchuyimlang block-i, farm school lapokba nükjidong aser inyakyim indang lemsatpa liasü. Kasa mapang nung school tesayur Akumjongba-i pa tajangshibatem indang lemsatapa aser pa indang farm tenzüka indang metetdaksü.

Kasa mapang nung farm school nung kaketshir 17 nem

"Basic Apiary Management" dak sendakba nung tesayuri tangazükba agüja liasü. Pai Apiary farm kodang anepalutsü iba indang tangazükba agütsüba mapang ninang colony tem koda aser kodang anepalutsü iba indang lemsatapa aser takok tashi anü peria yalokba aser tziü o chiyongtsü peria aliba tesem nung ninang metsütsü ajungshi.

Kasa anogo Longkong yimtsüng nung Food Security Group; Teroto Naro tentetsü, kong züngsem 8 lir. Abenla B Jamir, ATM, Chuchuyimlang Block-i iba telok tentetba nükjidong aser shilemtem indang lemsatapa liasü. Maneni iba telok ajungmesotsü aser nongita yaritsü atema senotsü teyari agüja liasü.

Longleng nung Carol ken tentepba tetoktepba agi



Deputy Commissioner Longleng, Dharam Raj-i sempet agütsüba noksa nung angur.

Dimapur, Luchii/December 16 (TYO): Longleng jila nung December 14 nü jila nung alirtem meyirejang aikati coral ken tentepba tetoktepba nung shilem agiogo.

Iba tetoktepba ya ADC Longleng, Alongdhimen Jamir, aser Longleng Town Council Administrator tawabangba kübok Longleng Town Council-i ayongzüka agia liasü.

Iba sentong ya lokti nung telongjem adodaktsütsü aser Christmas indang chichiba tanüla angatetdaksütsü nükjidong nung ayongzüka agiogo.

Lokti pela agizükba o jembiba mapang, ADC Alongdhimen Jamir-i lokti tanüla ajungkettsü asoshi pa nükla aliba indang lemsatapa den takok anguba dang nungibo shilem agibaji tongtibangba ta ashi.

Sentong nung alakteta jaoker DC Longleng Dharam Raj-ia benjung salem lemsatapa aser lokti-i shilem agitsü koda tongtibang iba indang jembiba den tetoktepba nung shilem agir ajak nem parnok sempet tajung

sayuba atema tenügsang agüja liasü.

Tetoktepba nung kiyon aser Arogo balala nungi carol telok 14-i shilem agia liasü. Iba tetoktepba ya Medical Ward-i akok aser parnok nem senpet sen 10,000 den kuli kakets agüja liasü. Kasa mapang nung tanabuba aser tasembuba jenjang nung Shauli Ward aser Police Church, Longleng na liasü aser parnok nema senpet sen 7,000 aser 5,000 agütsüogo. Maneni tetoktepba nung shilem agiba telok ajak nem sen 2000 agütsü koba SP Longleng, Yanger Jamir-i sponsor süa liasü.

Iba sentong ya Enyuh Phom lenisüba nung agi aser Parish Priest of St. Joseph Church Rev. Fr. Alex Vizo-i Tsüngrem temoatsü meshizüka sarasadema liasü. Tetendangertem rongnung Tenhau, Associate Pastor LTBC, Longleng Town Baptist Church, Retired Teacher Onghsong aser Chingmei Native Music School, Longleng Proprietor Shukshuha nunger densema liasü.

Dimapur nung mejangjaba tasü mang ka nguteta lir

Dimapur, Luchii/December 16 (TYO): December 16 nü 11:30 ako shi nung Shiv Mandir Railsay Bazar anasa tetsür tasü mang ka mepidaka aliba indang SBN PS. Dmapur duty officer nungi telephone ajanga osang angazüka liasü.

Iba sülen Women PS duty party iba tesemi aritepa ao aser tenük kuli agütsütem matsügdang tasü mang ya asadanga liasü, ajisüaka maitsü mejangjatet. Temzüng ozüng kübok tinyaktsü maparen ajak tembanga inyakba sülen

tasü mang ya post-mortem examination/identification atema District Hospital morgue-i benerogo.

Asüla yagi tanak agi temdang aliba T-Shit temesung ka, long pant tanak aser pink slipper ka semer liasü aser hon sentü kisen ana aser anor liasü.

Iba dak sendakba nung kinunger aser medemertem dang Officer-in-Charge den iba number; 7085055027 ajanga tongteprateptsü asoshi mepeshia metetdaksüogo.

PM Modi aser Oman Chuba Tarik nati linük ana tesendaktep atema jemb



December 16, 2023 nü Hyderabad House, New Delhi nung Ato kilonser Narendra Modi-i Oman Chuba, Haitham Bin Tariq agizükba sülen tangokba noksa nung angur.

New Delhi, Luchii/ December 16 (Agencies): Honibarnü New Delhi nung Ato kilonser Narendra Modi aser Oman Chuba, Haitham Bin Tariq na senden mena tenati lenla aika nung linük ana tsüingda amalitepa inyaksü atema jembio.

Lenir anati shishilembaba aser investment nung amalitepa inyaksü aser space & financial technology tsütsü amalitepa inyaksü atema jembio. Tena senden tembangba sülen osangbenertem den jembidang Foreign Secretary, Vinay Mohan Kwatra-i, lenir napronglai kiralongra tebilemtsü atema lemsatepogo; tenatisa energy security, talisa green energy atema amalitepa inyaksü jembio, ta

metetdaksü. Foreign Secretary-isa, India aser Oman nati anüolen Indian Ocean nung maritime security atema amalitepa inyaker aser linük ana tsüingda defence tsütsü tesendaktep-a kanga junga lir, ta metetdaksü.

Oman nung India nunger aika lir. 2022-23 kümsük nung linük ana tsüingda shishilembabaji dollar sen billion 12 ser tesadang liasü.

Modi aser Tarik natisa regional aser international onük balala atema o lemtep aser 'India-Oman Joint Vision Partnership For the Future' atema renem. Joint Vision ya Ato kilonser indang Amrit Kaal vision kübok 'India's Development Vision' aser 'Oman's Vision 2040' atema

tamendakdak lir. Iba Vision Document ya linük ana tsüingda sector 8-10 nung rangloker inyaksü atema lir, item sector rongnung tziyim nung amalitep, connectivity, energy security, space, digital payments, health, tourism, hospitality, aluyimba aser chiyungtsü security densema lir.

Tamalen linük anati Information & Technology, sobaliba aser rongsenkettzüng tsütsü ozüing alema inyakba nokdangtsü atema tezüingzüktep agia lir.

2018 küm February ita nung Ato kilonser Modi-ia Oman semdanga liasü.

Oman Chuba Tarik-i anogo asemnü India semdang; pa den minister tem aser tongti ketdangsertema aika arua lir.

Tetsür no menden nung lia raksaa indokba nokdangtsü atema inyaker

Bengaluru, December 16 (Agencies): Tanur no menden nung lia tetsür süra raksa-a indokba nokdangtsü atema Karnataka state sorkari mera agia inyakdar.

Hokolbarnü Karnataka state assembly nung jembidang Health Minister, Dinesh Gundu Rao-i tanur no menden nung lia tetsür süra raksaa indokba nokdangtsü atema sorkari asalentong balala yanglua inyakdar, ta metetdaksü.

Iba tebilemtsü nokdangtsü atema ozüing yanglushitsü, mapatong tasen benoktsü, state-level task force ka tentettsü aser item ama tatalokbatem CID-i bushisüingdangtsü.

Health Minister Rao-i, tetsür no menden nung lia raksaa indokba nokdangtsü atema health department aser police department nati amalitepa inyaksü nungdak, ta ashi.

Paisa Sub-division-level

monitoring committee tentettsü aser amalitepa inyaksü atema ketdangsertem nem mapa lezmüksütsü, ta metetdaksü.

Karnataka nung tetsür-tebur ratio tamajungba akümba metetdaksü dang Rao-i, "Civil registration data reprangdangra, yaküm tebur 1,000 shia nung tetsür 947 liasü saka takümbo tebur 1,000 shi nung tetsür 929 dang kümogo. Tetsür-tebur ratio kanga ajema kümogo," ta metetdaksü.

Assembly nung Opposition lenir densema MLA tem-a aikati state nung tetsür-tebur ratio tamajungba akümba tebilemtsü benoka liasü.

Iba tebilemtsü nokdangtsü atema state sorkari health department indang call center asentenshitsü aser tim departments den tongtepratepa tangaliba ozüingtem yanglushitsü.

Minister Rao-isa, iba tebilemtsü nokdangtsü atema

ASHA aser anganwadi workers aser lenirtemi mita reprangtsüla aser osang metetdaksütsüla, kechiyong ketdangsertemi mita aoba kija agibo iba tebilemtsü menokdangtetsü, ta metetdaksü.

State sorkari District health officers (DHOs) aser family welfare officers danga ita asem shia peipei tesem nung hospital tem mita aotsü tuyuogo.

Thirumalashettyhalli nung tetsür no menden nung lia raksaa indoktsüba osang ka jungkai adokba sülen Bengaluru Rural police team ka dang SPG Hospital & Diagnostic Center kibur, Dr. Srinivasa aputsü tuyuogo aser iba hospital nung inyaker staff trokbo puogo.

Bengaluru Rural SP, Mallikarjuna Baladandi-i, iba hospital nung ozüing alema no menden nung lia tetsür raksaa indoker tetsütem anema inyaksü, ta metetdaksüogo.

Pakistan den arrtsülen launchpads nung kiralongrar 250 shi lir: BSF

Srinagar, December 16 (Agencies): Pakistan den arrtsülen launchpads nung kiralongrar 250 nungi 300 shi lir; parnok Jammu & Kashmir telungi aittsü tebilemba lir, ta Honibarnü Border Security Force (BSF) ketdangser kati metetdaksü.

Ajisüaka Jammu & Kashmir nung security sepaitem renema dang lir aser kiralongrartemji nokdangtetsü, ta paisa metetdaksü.

Honibarnü South Kashmir kübok Pulwama district nung osangbenertem den jembidang BSF Inspector General, Ashok Yadav-i, "Launchpads nung kiralongrar 250-300 shi lir, ta

intelligence ajanga lazükogo, ajisüaka onok (BSF) den Army tem tongtibang tesem ajak nung lir aser yakyaka dang lir," ta metetdaksü.

Arrtsülen BSF aser Army tem yakyaka lir, aser kiralongrartem arrtsü adena aittsü merangyonga onoki nokdangtetsü, ta paisa metetdaksü.

Yadav-i, "Tesüiba küm ishika tsüingda security sepaitem aser Kashmiri nunger tsüingda tesendaktep kanga junga kümogo. Nüburtemi onok den amalitepra onoki terenlok mapatem tajungtiba nung inyaktetsü," ta metetdaksü.

Parliament nung security raksabaji mapa manguba tebilemtsü ajanga lir: Rahul



December 16, 2023 nü AICC headquarters, New Delhi nung Congress Tir, Mallikarjun Kharge aser party lenir Rahul Gandhi na senden ka nung tangokba noksa nung angur.

New Delhi, December 16 (Agencies): Narendra Modi-i aniba NDA sorkar aija Honibarnü Congress lenir Rahul Gandhi-i, Parliament nung security raksaba tongti kuliji mapa manguba tebilemtsü tuluba akümba aser jenjang maneni atuba ajanga lir, ta metetdaksü.

Osangbenertem den jembidang Rahul Gandhi-i, "Kechiba Lok Sabha nung security raksa? Tang linük nung tebilemtsü onük tulutibaji mapa manguba tebilemtsü lir. Modi mapatongtem ajanga India nunger lanurtemi mapa mangur. Atangji security raksaogo, saka iba kuliji mapa manguba tebilemtsü aser jenjang maneni atuba agi lir," ta metetdaksü.

Ano külen Congress Tir, Mallikarjun Kharge-ia Parliament nung security raksaba atema Union Home Minister Amit Shah aitsü. Kharge-i, Shah-i osangbenertem denbo jembir saka senden nungbo official sangdong magütsüteter, ta

ashi. December 13 nü Parliament nung security raksaba nung ajemdaker BJP-i aniba NDA sorkar aser opposition na maneni sashia aitsütepdar.

Parliament nung security raksaba dak sendakba nung Delhi police-i tongti aibelener Lalit Jha densema tang tashi nung nisung trok pua lir.

Honibarnü Patiala House Court nung ken o jembidang Lalit Jha-i, parnoki akhangba onüktem ataloktsütsü atema pa densema tangartemi linük nung rongrong adokdaksütsü nükjidong nung inyaker, ta ashi.

Public Prosecutor Akhand Pratap Singh-i. Jha-i iba ken o nung asalentong yanglur tongtiji pa lir ta pasasa nangzükogo, ta ashi.

Singh-isa, Jha-i kuli raksatsütsü atema tai tonglokja alir ajak indang phone meshia raksatsü aser pa indang phone-a Jaipur nungi Delhi-i aoba mapang indok, ta metetdaksü.



December 16, 2023 nü Tibetan yimsü lenir Dalai Lama-i Bodh Gaya semdangba mapang Mahabodhi tekülem kidang sarasadem dang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, DECEMBER (LUCHEI) 17, 2023

Tsüngrem dang meimba

Tsüngremi asenok kanga meimba agi, Pai pa chir ka dang aliba Yisu Khrista alimai yoker nisungtem menen alangzüksü asoshi Paji tepsetdaksü. Iba temeim zü jagi asenok tanübo atakatem nung alitsü melen temoatsü nung alir aser tesamadaki aotsü melen teküzmükdaki aotsü yongyar. Ibaji Tsüngrem temeim aser taochi ajanga lir. Atangji, tanüa asenoki aiben Tsüngremi maginütsüsa bilemer, jembir aser inyaker saka ken nung atenba ama " Tsüngrem taochiji asen menen dang taoba (tuluba)" asüba agi, Pa temeimi asen menen jenti liaka ibaji mali kuma nembanga toktsür ta 1 Peter 4:8 nung shia angur. Aji oda, alima nung asenok taküm litetba ya Tsüngrem temeim ajanga lir. Ajibo asenoki melamelaa angatetter. Ajisüaka, asenok asoshi tebilemdangtsü aser teinyaktsü tongtibangtibaji Tsüngrem dang meimtsüba ya lir. Atangji, Tsüngrem temeimji masadangtet temeim saka asen taküm ali tepiyong Tsüngremibo asenok meimer saka asenokibo Pa memeimer ta jangratemabo lia moutettsü. Iba jagiang Rom 8:28 nung ashir, " Tsüngrem meimertem atemabo taküm nung atalokbatem ajak tajung asoshi dang ataloker." Tetezü Tsüngrem memeimertem asoshibo taküm nung atalokbatem ajakbo tajung asoshi ataloker masütsüa akok. Aji oda, kodang asenoki Tsüngrem meimertem o memeimertem na tsüngda Tsüngremi inyakba mapatem indang bilemdangdir, Tsüngrem nem dang asenok meimdaktsütsüba masü saka asenokia Tsüngrem meimtsüba kanga tongtibanga ta angatettsü. Ajisüaka, asenoki Tsüngrem dang kechi komaka meimtsü? Tsüngrem nem asenok temeim sayua chiyongtsü ka agütsütsüa masü mesüra sen agütsütsüa masü. Asenoki Tsüngrem nem sempet-a magütsütet, kechiyong Tsüngrembo tanüla lir. Ajisüaka, Laishiba ashir, " nisung kari ni Tsüngrem meimer tabo ashir, saka pai pa adianu sempara pa tiyazü jemir, kechiyong pei tenük agi ngutetba pei adianu ka dang memeimtetba nisung jagi manguba Tsüngrem dangbo memeimtettsü." Tetezü, tangar dang meimbaji Tsüngrem dang meimer asütsü. Iba jagiang 1 Yohan 4:8 nung ashir, " Nisung shiba temeim memetet, pai Tsüngrem memetet, kechiyong Tsüngremji temeim lir." Tetezü asenoki Tsüngrem dang meimtsüba tangar dang meimba temeimji asütsü. Apijemtsü Shin 19:17 nung ashir, " Nisung shiba sensakertem dang meimer pai Kibuba nem aputsür." Kodang asenoki iba Lai tekong ya jungjunga bilemdangdir, Tsüngrem nema dena asen akaba nungi aputsütettsüa asen alitsüba koda takar aser jangratemtsü taküm asütsü. Atangji, Tsüngrem nem asenoki sen mesüra tsük maputsütettsü saka aseni sensakertem dang meimba temeimbo aputsütettsü. Iba temeim yabo tanaben meyipa angutsü imlaa meimba temeim masü mesüra tangari asen dang meimba temeim bilemteta meimba temeima masü, saka Tsüngremi kechi koda asenok angati meim, iba amaji asenokia tangar dang angati temeim sayuba mapatem asütsü. I Korint 13: 8 nung "Temeim kodanga majentsü," ta shia alibaji, Tsüngrem temeim dang masü saka asenoki nungdakba purtem dang meimba temeima kodanga majentsüba indang ashir. Sayutsüngir 11:1 nunga ashir, nungdakba purtem dang angati meimbaji tzu manung chiyongtsü proka yutsü amai saka tanaben tepela nung meyipa angur. Aji oda, nisung kati Tsüngrem nisung nem tzüzü marok ka agütsüba dena meyipa memoatsüi malitsü ta Yisui Mark 9:41 nung shia angur. Item Laishiba tekongtem nung shia aliba Tsüngrem o temji kodang asenoki shisadangdir, Tsüngrem meimtsüba Pa nem tenla ka agütsütsüba masü saka tangar dang meimtsüba indang ashir. Anungji, asenoki nungdakba pur ka meimli, Tsüngremi asenok tali meimli aser asenoki sensaker dang temeim sayuli, Pai asenok dang temeim tali sayuli ta asenokji Tsüngrem meimer kumadoker. Christmas ya Tsüngrem temeim nisungtem rongnung jungkai adokba mapang lir, iba mapang ya asenok asoshi Tsüngrem dang meimtsüba mapang tajungtibaji asütsü.

OLEMSABANG



Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA

E-mail : abamimpur7@yahoo.co.in

Website: www.abamimpur.org

December 14, 2023

ABAM SESQUICENTENNIAL CELEBRATION PHOTO ALBUM ADOKOGO

Asen limai Khrista Yimsü arur küm 150 ajungba tepela benjongmung "Tsüngrem Dang Sentsüwangshi" omen dak rangloker November 1-3, 2023, temoatsü ngua mongtetogo. Iba benjongmung nung agiba noksatem bendener Sesquicentennial Celebration Photo Album, kanga junga renemer adoka lir. Ibaji ABAM office nung December 13, 2023, nü meshiteta sarasademogo. Photo Album nung aliba noksatem reprangdang temenungratsüka bilemteter aser Tsüngremer tesüngmangtsü mapatem bilemtetdaksür.

Iba Photo Album ya tang alirtem aser tarutsü lanu putu asoshi senti kaket ka asütsü. Iba mapa ya SOC Media & Documentation Committee purtemi kanga meranga, nebu aser mapang jenti endoka kanga abensaa aser tobur junga adoktsüba asoshi ABAM-i parnok dang pelar.

Iba Photo Album ka jenjang sen ? 500/- (Five Hundred) alitsü. Copy ishika tang menüng asünung taginertemi teküpoklen agüja aliba ABAM tenzükertem den tongtepratepangma :

1. Dr. Moanungsang Tzüdir, Mobile - 9862272186
2. Mr. Imsentiba, Mobile - 7085676239
3. Mr. S. Meren Longkumer, Mobile - 8731049317

Sd/-

Rev. Dr. Mar Pongener
Executive Secretary, ABAM.

Arogo nem inyaktsü nungloktsüba tongtipang mapa kar

~ L. Kika Pongener.

Arogo ya asen mimchir taginuba agi tenzükba lokti ka masü, saka tejen putu nungi Tsüngremi shinzüka toktsüba aser Yisu alimai arur külena pai shinzüka toktsüba ama, pa dak amanga temulong meyipapurtemi tenzükba lokti ka lir. Yisu-i ashi, "Na Peter aser iba lung manung ni kü arogo yanglutsü" (Mathi-16:18). Anungji arogo yabo tanga lokti-tentet ka ama masü, saka laishiba tuyuba/sayuba ama anitsüla/alitsüla. Aji oda, arogo yabo yimden-yimli, shilang alangba 'Putu Menden' ka ama manitsüla. Arogo inyakyim yabo sorkar inyakyim/yayim (Pattern) ama manitsüla. Tesasatsüka, tanü asen lima nung arogotem reprangdanga ora, teimba ka inyakyim aika nung tanga lokti-tentet (Organisation/ Association) inyakyim mesuka aniba angur.

Arogo nem inyaktsü nungloktsüba :

Yisu-i pa kodaki atutsü mapang, pa nutsüngtem/pa dak amangertem nem nunglokja ashi... "Nenoki oang aser kin ajak nutsüng kümdakjang. Tebu, Techir aser Tanela Temeshi tenung nung parnok Bapti-jang. Ni nenok dang kechisa mela ajak bentshitsu parnok dang sayuang" (Mathi-28:19). Yisu-i pa nutsüngtem aser pa sulen anidakertem nem nungloktsüba 'Arogo' nem inyaktsü nungloktsüba ta angateter. Anungji arogo teinyaktsü mapa tongtipangbaji, osangtajung tenyaba aser Tanela anir aruba mapa, aji ajak dang tongtipangba asütsüla. Ajisuaka, tesasatsüka, tanü arogo aika, Khristar arogo memesuki, Yisu-i nungloktsüba mapa tongtipangba-bo tezülen agiena yur, terenlok mapa (Development) nung dang tuluba rangloker inyakba angur. Tanü arogotem nung benjongbentsü aser chidiyungdiba nung arogo rongsen teimba indokba angur.

Arogo nem agütsüba tashi :

Arogo nem agütsüba tashi (Authority) -ji laishiba nung reprangdanga, Yisu-i Peter dang ashi... "Ni ne nem kodak yimli sungküm-rutsü agütsütsü; aser nai kechisa alima nung alendir aji kodak nung alentsü; aser nai kechisa alima nung saladir aji kodak nung salatsü" (Mathi-16:19). Yisu-i iba tashi agütsüba ya... Peter kija nem agütsüba masü, saka arogo nem agütsüba ta angateter. Onok lanuwa asüdag, arogopur kar Bodhbar/Honibar aonung alu nung yipra tatok nangzükdaksü, kar deobar-nu tzümalen shishia jajaba metetra tatok nangzükdaksü, kar ashi-auyaba puteta yimdeni senchi chira ajia tatok nangzükdaksü, saka, tanübo ret-reta talenba ka maka zübazüba-a dang amangteper. Ano sadi külizüng agütsüba ya-a, kanga ret-reta bentshia aru, saka tanübo karbo küm ana-agem kibong kümer amai, külemi lia aliba, arogo-i sadi küli agütsüba-a lir. Akhidangpo Temeshi kiyimba külizüng agizüker aika mali asü, saka tanübo sadi külizüng magi sadir-ang kanga ajema lir. Aji khen arokaroka bilemdangdi... Anungji arogo-i kechi salar aser kechi alener, aji kodak nunga salatsüsa aser alentsüsa kanga metsüngareta bentshüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir



Good News Global-i Khristmas mapang tepuokdak alirtem semdangtsü

December 16, 2023: Khristmas mongpu nung prison ministry kati tepuokdak alirtem nem sempet 65,000 lema agütsütsü aser Khrista osangtajung lemsateptsü.

Good News Global (tamalen Good News Jail & Prison Ministry)-i US kübok state 16 aser linük 18 nung tepuokdak alirtem semdanga sempet 65,000 agütsütsü; item sempet rongnung Khristmas sempet ka, card, 2024 calendar, chiyungtsü aser hygiene osettem densema lir. Parnokisa tepuokdak alirtem den Khrista osangtajung lemsateptsü.

Osangbener den jembidang Good News Global Tir, Jon Evans-i, "Hope Packs (sempettem) ya jail nung alirtem atema inyakba osangtajung outreach ka lir. Taruba

Khristmas nung onoki sempet 65,000 den Khrista osangtajung lemsateptsü," ta metetdaksü.

Ministry indang website ajanga ashiba agi, Good News Global indang mission ji jail nung Khristan chaplain tem nem tepuokdak alirtem tanela nüngdak peritsütsü atema lir.

"Tepuokdak alirtem aser staff tem tanela nüngdak peritsütsü atema anogo shia parnok den chaplain ka alitsü nüngdak. Chaplain jagi pastor ka ama, counselor, tesayur aser medemer ka ama inyaker aser parnok küzmüker," ta Good News Global-i metetdaksü.

Good News Global ya tajangzük mebushiba Khristan melungtet telok ka lir aser iba ministry kübok US nung aliba state 22 aser linük 25 nung chaplain 400 lir. Parnoki

tamangba yimsü balala amangertem aser jail nung puoka alir 400,000 dak tema anepalur.

Yaküm osangbener den jembidang Chaplain Joe Kely-i, "Parnok jail nung tembangtsüa akok. Tsüngrem dangi meyiptsü atema mapang ka lira iba mapangji tang ama mapang (jail) ya asütsü akok," ta metetdaksü.

US nung aliba Chaplain temi jail ajak nung religious program coordinator kaka ama inyaker. Parnoki pastoral teyari agütsüba den külemi tanela tsütsü nüngdak balala agütsür.

2021 küm nungi tenzüka Good News Global-i Hope Packs lema agütsür aser taruba Khristmas nungbo alima tesem ajaklen jail nung alirtem nem Hope Packs sempettem lema agütsütsü.

Osangtajung kentener, Pedro Henrique ken tetendak mapang asü



December 16, 2023: Bodhbar aonung (December 13) Brazil nung osangtajung kentener, Pedro Henrique sabang nung ken tetendak mapang temelungjang tashidak agi süadok; pa arrshi küm 30 dang liasü.

Pa indang record label, Todah Music-i, pa temelungjang tashidak agi asü, ta metetdaksü.

Brihostibarnü Todah Music-i social media ajanga, "Taküm nung koda masüba tensa asenoki ajurur, aser item atemaji asenoki rasa-a

meshiteter. Ajsüaaka ibaji Tsüngrem melung liasü, ta asenoki angatetsüba dang," ta metetdaksü.

"Pedro ya pelaa dang aliba lanur ka liasü. Ajaso jabaso. Kinümbu ka aser tebu ka liasü. Christian music sector-i pa atema mangyimer. Todah Music family-i mangyimer. Kodak nung kentena jabaso agizüker: Tatem salem, Pedro Henrique! Tanela Temeshi ajanga ajak melung sünepjang. Pa kentem aser pa ola kodanga masütsü aser pai toktsüba senmangji pa kinüngtsü, jala

Zoe aser taküm aika madak alitsü aser pa ola ajanga Khristai nisung aika kongshitsü," ta Todah Music-isa metetdaksü.

Video noksa nungji Henrique-i "Vai Ser Tão Lindo" ken tetendak mapang ajungbena ali nung ondaka laor. Iba sülen pa anasa aliba medical clinic kati anir ao saka meküzmükteti asü.

Instagram nung pa indang followers million 1.1 dak tema lir. Henrique-i mezüng pai kentenba videos YouTube nung lemsatepba music industry nung ajemok.

2017 küm pai pa indang mezüngbuba kensep 'Grande é o Senhor' sayaa liasü.

Viberate Notes website ajangai, "Pedro Henrique indang kentem ajanga pa tamang jenjang tashi itta aliba sayur. Pedro Henrique-i tanü putu Khristan music aser Brazil nung sobaliba kensü na meyokteper ken mejemer, aser ibaji pa yimsü (Khristan) ajanga ajungmesodaktsür," ta metetdaksü.

ANOGO ABEN TSÜNGREM DEN

Tezülen alir atongba

Kolosi 4:5-6

Mapang tajung alizüka, tesülen alirtem tsütsü shisatsü nung jajaang.

Pauli yangi asenoki mapang tajung ajak amshitsü ashir - kuli asütsü mapang tajung. Asenoki aji mezüdokli. Asenoki osangtajungji mamangertem den lemsateptsüla.


Mapang tajungji teti asenok den malir. Ibai arur aser süia aor. Ibai lemsü mesük - aruya angur aser süia orbo asenoki tejaklen lemsü to masü tesülen dang angur. Tanübaji dang asenok meyong. Asüngji asenok den mali. Tanü topur junga, tashi itta aliba ama asüng malitsü akok. Anungji tanü ta ajaba mapang tajungji alangzüktsüla.

Yisu Khrista kuli sürtem ama, asenok nem mapang tajung moatsür. Asenok renema alitsü Kibubai kuli tejangja agütsür. Itemji mapang tajung kichiba lapokba ama arur, shidak jembitsü aser shidak nangzüktsü mapang tajung lapoktsür. Kichibaji lapoka lir aser shibangtsü. Asenok mulungjang nung kechi lir aji ashitsü asenok mapang lir, tasüngdangba nung telangzüba agüjang, anepaluba kuli süba jembiang, idakji mapang aotsü.

Khristai samaa aliba pur atema aria bilemba aser alangzükba temeim agi ajungmesodakja asenok Pa o agi sobua renema alitsüla aser kichiba lapoktsübaji metetta alitsüla. Tanela, shibai asenok anir aser Khrista O tem bilemtetdaksür iba asoshi asenoki Tsüngrem tenüng sangdi.

Kibuba, kuli asütsü asoshi mapang kichiba lapoktsüba asoshi ni sayuang aser renema alitsü sayuang.

Lowa nung Khristan, Michael Cassidy-i satan kürazyanglu raksatsü



December 16, 2023: Tawa US kübok Iowa State Capitol nung taoba mapang sepai Khristan kati satan kürazyanglu ka raksatsüba sülen pa anema ken o benoka lir.

Court nung legal fees atema pa yaritsü asoshi Brihostibarnü ghonda asem tsüngda tenla dollar sen 20,000 dak tema agütsüogo.

Arrshi küm 35, Michael Cassidy ya taoba mapang Navy officer ka lir. Iowa nung Satanic Temple indang satan kürazyanglu ka raksatsüba atema pa anema ken o benoka lir.

Yimjak nung satan kürazyanglu ayuba onük nung mangatettep adoka hopta ka shi online nung o entepba den külemi state legislators tsüngda o toktepa aruba mapang nung Michael Cassidy-i satan

kürazyangluji raksatsüba sülen pai police matsüngdangi oa liasü.

Cassidy-i satan kürazyanglu raksatsüba osangji social media nung prokshiba sülen Republic Sentinel-i legal tsütsü pa yaritsü atema GiveSendGo nung legal defense fund ka tenzüker.

Parnoki dollar sen 20,000 bosa bendentsü nükjidong nung iba fund tenzüker. Yamaji ghonda asem majungdang dollar sen 20,000 bendentetba sülenbo iba fund bendenba shibangadok.

Cassidy-i X ajanga, "Nenoki ajaki pusema yariba atema pelar. Onoki bilemba ama ghonda ana tsüngda dollar sen meyrjang 20 bendentetogo. Iba fund campaign anenadoktsü atema ni tuyu, kechiyong onoki peria bendentetogo," ta metetdaksü.

(Maneni tapak 8 nung...)

**AO OSHI ANGAZÜKDAK:
TANÜ ANGAZÜKTSÜBA OJANG**



Sepket

(v) temaleni tera bener atu, atsüket (pull up)

* Tanubusangi pa long pants sepket.

Seplangba

(n) ajak dang tesüsaba, tanubusang, tanutsüla (youngest)

* Ak chanutem rongnung seplangba tilaba asür.

OLONG PAITEP # 6646

1		2				3		4		5
				6						
	7		8							
9					10			11	12	
				13		14	15			
16					17			18		
				19		20				
21		22								23
24										

TIPLÉN

- 1. Saku - (4)
- 6. Songjen - (7)
- 7. Mali/Tazung - (4)
- 9. Tasen apok - (6)
- 11. Songlem - (3)
- 13. Ata liasü - (5)
- 16. Tzunglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. ___ tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6645 TELANGZÜBA

TIPLÉN :

- 1. Alang, 3. Pakti, 7. Bangka,
- 8. Sar, 9. Menungrar, 10. Pen,
- 14. Kümzü, 15. Anema, 16. Kimen.

LANGTSÜNGLEN :

- 1. Amena, 2. Aibelen, 4. Ayak,
- 5. Tenyar, 6. Ngs, 8. Sangküm,
- 9. Menden, 11. Kilen, 12. Aküm,
- 13. Ama.

NAI-A YA METETTER MA



Swiggy ta ajaba online food delivery platform nung Bengaluru-i "Cake Capital" nungja nguogo. Swiggy website nung "How India Swiggy'd in 2023" ta ser blog post ka nung Bangalore nung alirtemi 2023 küm cake 8.5 million order asü aser nisung teimbai chocolate cake order asü ta shia lir.

United Liberation Front of Asom-Independent-i Assam DGP GP Singh jazüker



Paresh Baruah

G.P. Singh

Guwahati, December 16, 2023 (Agencies):

Assam Director General of Police GP Singh-i United Liberation Front of Asom-Independent (ULFA-I) dang pa amaksü jazükba sülen anogo ka lir ULFA-I-i tayongzükba agizükog.

ULFA-I-i GP Singh dang Guwahati nung hopta ka security melii senzüsü shiogo.

"GP Singh-i December 15, 2023 nü osangbener den jembidang ULFA-I jazükogo.

Onoki iba tayongzükba agizükog. Mezüng state police ketdangsur aser constable tem amshitsü melena CRPF mesüra Indian Army (WeSEA region lanurtem) amshiang. Tanabuba nung security medeni hopta ka

Guwahati nung senzüang" ta

ULFA-I-i ashi.

"Küm 10 tejakdang onoki Assam Police den (WeSEA) region nungi military officers/ members den mekhateptsü lemtetogo. Kechiyong tesüiba mapang onoki Dibrugarh Superintendent of Police Daulat Singh Negi aser Tinsukia Police Superintendent R K Singh na den khatepdang külem adianu aika khasetogo" ta ULFA-I-isa ashi.

Tang G P Singh-isa adianu tsüngda khatepdaksütsü meranger. Anungji ULFA-I-i pa dang iba mapa meinyaksü tuyur ta parnokisa metetdaksü.

"Nai onoki jazükba ama meinyaksü ta kechiyong na tasü mait ta meteta lir. Nai Swadhinata Phukan ama lanur ka aonung yipden nung mejanga lia anir orr khaset" ta ULFA-I-isa ashi.

Manipur angopurtemi Loktak hydro project extension magizüker

Imphal, December 16, 2023 (Agencies):

All Lake Areas Fishers Union, Manipur (ALLAFUM)-i Loktak Hydroelectric Power Project extension asütsüba anema noktaker.

National Hydroelectric Power Corporation Limited (NHPC)-i Ministry of Environment, Forest & Climate Change, Government of India dang Loktak Hydroelectric Multipurpose Project ya ano küm 25 atema mapang apuloktsütsü temelaba meshir.

"Manipur sorkar aser angopur meyrjang aika den masüngdangtepi NHPC-i inyaksangshir. 1983 küm nungi Loktak hydro project tenzükba sülen onoki timtem aika ajurua arur" ta ALLAFUM-i ashi.

NHPC-i Loktak Development Authority, Manipur sorkar aser Loktak fishing community den asüngdangya mesüi ano mapang atsülangtsü meranger. Küm 40 tashi Ithai Barrage atema atsütepa arur ta ALLAFUM-isa ashi.

Iba mapatong ajanga

kongshir nisung meyrjang aika rehabilitation aser resettlement atema NHPC-i sentong yanglua aliba yimjak nung ashitsüla ta parnokisa takhangba agütsü.

Ithai Barrage ajanga Loktak nung ango ajema akümer aser Loktak hydro project ajanga takoksa jenti ajurur, ta ALLAFUM-isa metetdaksü.

Loktak hydro project extension masüdang Manipur sorkari tebilemsü khurettem atema inyaksüla aser NHPC-ia takoksa ajururtem asoshi mapa inyaksüla ta ALLAFUM-isa ashi.

NIA-i Jorhat nung bomb apokdak bushisüngdang

Jorhat, December 16, 2023 (Agencies):

National Investigation Agency (NIA) telok kati tanü Jorhat nung bomb apokba tesem semdangogo.

Brihostibarnü Jorhat nung aliba Army cantonment anasa bomb tesashi ka apok. Aonung 7:20 ako meta bomb apok saka iba ajanga teraksa kecha bentsür maru.

NIA teloki iba tesem semdanga bushisüngdang süogo. Honibarnep yakta parnok Lichubari nung aliba

army camp No 41-i aru.

Tesüiba anogo ishika tsüngda upper Assam nung tesem balala asem nung bom pokogo aser iba ajanga state nung security tensa atema tasüngdangbatem adokogo. Talisa sangküm January ita Republic Day amongtsü jakdang tesem balala nung bomb pokdaksüogo.

Union Home Ministry-i bomb apokba tatalokbatem süoki ia bilemer aser NIA nem bushisüngdangtsü lemsütsü.

Jorhat district administration-

i iba tatalokba indang osang media den melemsateper. Ano Indian Army-ia video aser photo tem magidaksütsü atema army camp ajunga sü agi meibanga lir.

November 22 aser December 13 tsüngda Tinsukia, Sivasagar aser Jorhat district tem nung bomb pokdaksüba atema ULFA-I-i tenüng agiogo.

Chief Minister Himanta Biswa Sarma-i December 15 nü NIA Director General Dinkar Gupta den ajurutepa senden menogo.



December 14 nungi December 17, 2023 tashi Bengaluru nung aliba mall balala nung ZestFest ta ser Khasi mandarin orange ajungketba sentong ka agir. Iba sentong ajanga Meghalaya nungi Khasi mandarin naring sayutsü aser iba dak sendaka aliba inyakyimtem metetdaksütsü alizüng lir.



Japan nung Fukushima nuclear power plant nung inyaker ka dak radiation level tali kümer aliba ngutetogo, ta ketdangsütemi metetdaksü. October ita mapa inyaker pezü dak dak radioactive material keta aliba tzü shilokba sülen parnok ronung ana mozükidangi anir aoba sülen ita asem tsüngda tang iba osang ya agütsüogo.

Houthi teloki Israel, US dang tekümdangtsü metetdaksü

Sana'a, Luchii/December 16 (Agencies): Yemen nung amendaker aliba Houthi teloki Israel, United States aser anüolen aliba linüktem dang linük anema bendanger tashi karidanga jenjang agira parnok akoksatsüsa telangzüba tesashi agütsütsü ta tekümdangtsü metetdaksüogo.

Iran den sendaktepa aliba Houthi telok yagi Yemen kübok tesem timba ka azüoka lir, ajisüaka alima kintemi parnoki agizüka mali. Iba telok yagi Palestine nung Hamas telok purtem den raraba mapang Israel nongshitsü atema anogoshia amai tzüyim nung tongtambang lenmangtem maka arudar.

Houthi indang Ansarullah politburo züngsem Ali al-Qahoum-i ashiba agi, US, Israel aser tanga anüolen aliba linüktemi Yemen anema kechi jenjang agidir agiaka telangzüba agütsütsü asoshi parnok renema lir.

"US, Israel aser tanga bendanglen aliba linüktemi amokmerenaka Houthi puri, Palestine nung kechi atema nokdaker aji kodanga metoktsütsü," ta al-Qahoum-i Lebanon nung amendaker aliba Al Mayadeen TV den sensaksemba mapang ashi. Paisa, parnoki Israel anema maneni inyaksangshitsü, ta shisem.

Houthi teloki Red Sea nung

rongtem aiben amakba sülen alima nung shipping company tulutiba anati senzüsenpong ajak anena atatsü ta sangdongba sülen tang iba tekümdangtsü metetdaksüogo.

Danish shipping company Maersk-i Hokolbarnü ashiba agi, parnoki parnok indang rongtem Bab el-Mandeb Strait adena meyoktsü. Maneni German container shipping line Hapag-Lloyd-ia, Hombarnü tashi Red Sea nung parnok indang rongtem mesenzüdaksütsü ta shiogo.

Houthi puri Palestine nungertem pusema arudar aser tzüyim nung rongtem parnoki ama ta nangzükba den ashiba agi, "Gaza Strip nung nüburtemi nüngdaka aliba chiyongtsü aser mozü bener motsü tashi onoki Israel-i aoba rongtem ajak nokdangtsü."

Israel nung rongnendaki aoba rongtem dak alaka onoki alima ajunga nung rongnendak balalai aoba rongtem nem kecha timtem magütsütsü aser parnoki identification device tsükloka ayutsüla, ta kasa sangdong ajanga metetdaksü.

US National Security Advisor Jake Sullivan-i Tel Aviv nung osangbenertem dang ashiba agi, "Houthis puri injangji akhar saka parnok nem prangbongbo Iran-i agütsür."

Houthi puri Red Sea nung sadem sadema mesenzüdaksütsü asoshi

amokmerener, koba totzü aser khu abenba rongtem senzüsenpong atema kanga tongtambang lenmang ka lir, ta pai ashi.

Linüktem tsüngda shishilembaba shilem 40 bo iba tesem ajanga aoer aser iba tesem ajangerang Red Sea, Israel indang southern port facility tem aser Suez Canal-ia aoer.

Iba tesem ajanga aoba rongtem indang insurance taa tawa kanga aika kümogo aser oil tanker amala rong tulutem atemabo USD meyirejang aika kümogo.

Red Sea ajanga süiba warship tem nungbo prangbong hadir teperi bona lir asünung parnoki telangzüba agütsüteter ajisüaka shishilembadang amshiba rongtem kasa tekümsükba kübok mali.

Telungpurtemi Red Sea nung rong aika hijack süa azüoktsü merangogo aser November ita khenbo takok nguogo.

"Iba amokmeren ya agintsü asoshi United States-i, alima kintem, iba tesem aser alima ajunga nung onok den sendaktep alirtem den longjemer inyakdar," ta Sullivan-i ashi.

US, United Kingdom aser France nungi warship tem iba tesem nung maneni inyaksangshidar, aser parnoki Houthis puri khaloktsüba missile tem aika anüng nung khadangogo.

Russia election nung minprongra temerenshi agütsütsü: Putin

Moscow, Luchii/December 16 (Agencies): Russia tir Vladimir Putin-i Hokolbarnü, taruba küm election nung bendanger kari danga minprongra temerenshi tesashi agütsütsü ta nangzükogo. Taruba küma pa election nung toktepa takok angutsü imlar.

"Russia inyakyim nung kari danga minprongra merenshitsu aser Russia temzüng ozüing dak ajemdaker kanga sashia merenshitsu," ta Putin-i parliament indang lower house Duma nung party lenirtem senden ka amenba mapa ashi.

"Onoki nüburttem nüjiso, sovereignty aser parnok tarutsü shimtsü asoshi temeden aliba kümzükka ayutsü atema inyaker. Linük nung nüburttem dak dang tashi ajak lir," ta Putin-i ashi.

Taoba küm anüolen aliba linüktemi tenokdangba balala agütsüba aser Ukraine den rara nung tetsükdaksü adokba sülen 2023 küm tatemi Putin asüngsashir aliba ama reprangteter.

Mapang talangka nungi

Ukraine-i Russia nung sepaitem mintoktsü atema yongya ataba takok tajung mongutetba, rongsenketzüing mejungi aliba tajungba akümba aser US Congress o European Union nung Ukraine nem teyari agütsütsü benokba sota anüolen aliba linüktemi Ukraine nem teyari agüja aliba mejangjai akümba mapang ka nung Russia jenjang tajungba kümer lir.

Putin-isa, Ukraine nung sepaitem tepuokertem ama pudenba tawa kanga agi tajemba kümogo, ta ashi.

Taoba hopta pai pa tir menden pongubenbuba abentsü atema 2024 küm March ita agitsü aliba election nung tokteptsü ta sangdongogo. Küm 25 tashi linük yimsü asüba aser opposition tejangka maliba mapang ka nung pai election akoktsü temulung lema bilemer.

Alexei Navalny nung amala Russia nung opposition lenir tongtambangtem timba tepuokdaki yokogo aji mesüra linük nungi mintokogo.

Kuwait indang emir, Sheikh Nawaf Al Ahmad Al Sabah süogo



Kuwait City, Luchii/December 16 (Agencies): Kuwait indang Emir Sheikh Nawaf al-Ahmad al-Sabah, shiba November ita tatemlen temang nung timtem adoka mozükidangi anir oa liasü pa süogo, ta Reuters sangdong ka ajanga metetdaksü.

"Temulung kanga korema Kuwait state indang Emir Sheikh Nawaf al-Ahmad Al-Sabah asüba mang ayimer," ta Kuwaiti state television nung sangdong ka ajanga metetdaksü.

Sheikh Nawaf al-Ahmad al-Sabah ya November ita temang nung timtem adoka mozükidangi anir ao ajisaka pa kechi agi timtema anir ao iba indang onsang tejangja memetet. Taoba mapang state meyong news chanel temi ashiba agi, pa 2021 küm March ita temang anepalutsü atema Uited States-i ogo. Kuwait

lenir temang mejungi akümba ya linük nung ken o tongtambang ka liasü, kong telung nung tashi toktepa aruogo.

Kuwait nung sovereign tashi ya linük yimsü asüba Al Sabah'er kibong kabuma nung lir.

2006 küm Sheikh Nawaf crown prince asütsü pa adianu (half-brother) Sheikh Sabah al-Ahmad Al-Sabah-i shima liasü.

2020 küm Emir Sheikh Sabah Al Ahmad Al Sabah asüba sülen Sheikh Nawaf ya Emir aküm. Sheikh Sabah ya pa indang diplomacy aser parnok meketa aliba tesemtem ajak nung yimjung yangluba atema ajaki jangja liasü.

Sheikh Nawaf ya taoba mapang Kuwait indang interior aser defense minister liasü, ajisüaka sorkar inyakyim nungbo kanga yakyaka inyaka maliasü.



Gaza nung tesem balala meita aoba mapang Israel nung sepaitem tangokba noksa nung angur. Gaza nung aibelena Israel nung hostage asem tepsetba Israel nung sepaitemi nangzükogo.

N. Obang Memorial Football Team-i 13th Marsosang football trophy benogo



Champion team N. Obang MFT den organizer

Chuchuyimlang town, Luchii/December 16 (TYO): December 12 nü nungi tenzüka 13 buba Marsosang nüngtem asayaba Football Trophy Langpangkong Tsükong GHS Chuchuyimlang, play ground nung asaya-a arur December 16 Honibarnü tembangogo aser taküm iba asayamung marok N. Obang Memorial Football Team-i benogo.

Testisabuba asaya N. Obang MFT aser Team Gilgal na lemzüksüba mapang ajak agima tashi nung shiangaia goal kata magütsütet aser mapang talila apuokja asayaka shingaia goal magütsütet, anungji, penalty metsütepang N. Obang MFT-i goal 5-4 agi Team Gilgal madak takok tulu ngua liasü. Taküm champion abenba zünga N. Obang MFT-i iba marok tanaben atonga abener.

Iba asayamung nung champion nem trophy,

certificate den medal aser sen 1, 50,000/- (1.5 lakh) aser runner-up nem trophy, certificate, medal den sen 80,000/- (eighty thousand) agütsü. Semifinal tashi tongteter Ungerlong F/C aser Telongjem F/C nema senpettsüogo.

Iba den nija senpet (individual prizes) - best goal keeper: Homugha (N. Obang MFT), best defender: Limakumzuk (United boys), player of the tournament: Bapen (Team Gilgal), Highest scorer: Thejasetuo (Team Gilgal) aser Best Team senpetji Ungerlong F/C-i angu. Taküm iba asayamung nung telok 12-i shilem agia liasü.

Iba asayamung nung state aser district asayar tajung aika arua shilem agia liasü. Iba asayamung ya Rocky Club, Chuchuyimlangi küm ana nung khen ayongzüka asayar.

Taoba mapang asen tsüraburtemi saisapong tsütsü

ngujem (scope) mali ta sür lesson meranga azüngtsü dang ajungshi, ibayongji luyim balala nung tazüng temeteter aser tular adok, saka saisapong tsütsübo alimai meteta nüngtugu saisabonger kata madoktet aser madokteteter, education jia nungdaker saka iba mulungsentsüji melenshir pei chirnur dak koba sempet lir, iba nungji nungitba yayim (support system) ka nungdaker, ta asayamung shibangtsür, Mokokchung Food & Civil Supplies, Asst. Director, N. Jamonger Ao-i metetdaksü.

Paisa tanü alima nung nüngtugu footballer tenüng kar atishia parnoki sen aika aahba den par lima terenlok jenti bener arua alima melenshitsüba nung shilem tajung agiba indang otsü kar lemsatop. Aji oda, alimai metetba nüngtugu asayar kaka akümtsü mangdang yur asayatsü paisa ajungshia liasü.

India tetsür team-i run 347 agi England kokogo



DY Patil Stadium, Navi Mumbai nung one-off Test cricket match asaya India tetsür team-i England team akokba sülen pelatepa tangokba noksa nung angur.

Luchii/December 16, 2023 (Agencies): Mumbai nung India aser England tetsür team Test asayaba India team-i anogo asembuba nung otsüsütsüsa run 347 agi asaya kokogo.

India team-i tanauba innings nung yashi run 186 yanglur declare asü aser tanabuba innings nung England team asoshi target run 479 toktsü

Harmanpreet Kaur lenisüba nung off-spinner Deepti (4/32) aser pacer Pooja Vastrakar (3/23) nati anir bowler temi ball kanga junga ona England team

nem run 131 dang yangludaksü.

Iba asaya run 347 agi akokba ya tetsür Test cricket asaya nung run timtiba agi asaya akokba kümogo aser Sri Lanka team-i 1998 küm Pakistan team run 309 agi koker aliba ajatetogo.

Test 15 asayaba sülen India tetsür team-i tang mezüngbuba kidang England team kokogo.

Taruba hopta Australia den Masaya tsünga iba asaya akokba ajanga India team nem tashi agütsütsü.

Iba asaya nung Deepti-i

kanga junga asaya innings ana nung lai wicket teku agia liasü. Anepdang session nung India team-i kanga kara wicket agi aser pacer Renuka Singh-i Tammy Beaumont (17) out sütsü. Iba sülen Pooja Vastrakar indang mezüngbuba over nung Sophie Dunkley (15) aser Nat Sciver-Brunt na out süja liasü.

Iba sülen India team-i maneni asaya amokbanger asaya England team nungi batsmen tem talanglang memendaksüi out süja parnoki asaya kokogo.

India vs South Africa: Shami Test series masayatetsü

Luchii/December 16, 2023

Deepak Chahar-a kidang (Agencies): South Africa den Test asaya ana asayatsü aliba nung fast bowler Mohammed Shami masayatetsü. Team indang medical staff temi pa iba asayamung nung asayatsü asoshi temelaba magütsüba sülen pa masayatetsü, ta Board of Control for Cricket in India (BCCI)-i Honibarnü metetdaksü.

Shami, shiba ODI World Cup kanga junga asayaba sülen tetsüng teloktep nung timtem adokba ajanga anepalua liasü, pa India indang Test team nung züngoksemer liasü.

BCCI-i Shami melena asayar shimba osang kecha magütsü. India aser South Africa na tsünga December 26 nü Centurion nung tenzüksü.

Mezüngbuba Test Masaya tsünga India Test team nung asayatem December 20 nungi tenzüka anogo asem atema intra-squad asaya ka asayatsü.

Shami maneni kidang temang anepalutsü aser pa Hyderabad nung January 25 nü nungi tenzüka England den asayatsü aliba Test nungbo asayatsü imlar.

SA den tanabuba Test asaya ya Cape Town nung 2024 küm January 3 nü nungi tenzüka asayatsü.

Kasa mapang nung

Deepak Chahar-a kidang nüngdak kar adokba ajanga ODI team nungi aginogo.

"Kidang jongdak maparen kar adokba ajanga taruba ODI asayamung nung shilem magitetsü ta Chahar-i BCCI nem metetdaksüogo. Tebur Selection Committee-i pa melena Akash Deep shimogo," ta BCCI-i metetdaksü.

BCCI-isa, Deobarnü Johannesburg nung mezüngbuba ODI tembangba sülen Shreyas Iyer-a Test team den longjemtsü, ta metetdaksü.

Maneni BCCI-i ashiba agi, head coach Rahul Dravid aser support staff tema ODI asaya asem nung shilem magütsü. Parnok ya taruba Test asaya atema renemshiba mapang inter-squad asaya-ang asadanga alitsü.

Parnok maliba mapang KL Rahul-i aniba team ya India 'A' coaching staff temi anepalutsü, kong batting coach Sitanshu Kotak, bowling coach Rajib Datta aser fielding coach Ajay Ratra nunger densema lir.

India ODI squad: KL Rahul (captain, wk), Ruturaj Gaikwad, Sai Sudharsan, Tilak Varma, Rajat Patidar, Rinku Singh, Shreyas Iyer, Sanju Samson (wk), Axar Patel, Washington Sundar, Kuldeep Yadav, Yuzvendra Chahal, Mukesh Kumar, Avesh Khan, Arshdeep Singh, Akash Deep.

Low nung Khristan... (Tapak 5 nungi...)

Daily Wire ketdangser, Matt Walsh-i sen 1,000 tenla agütsü aser Turning Point USA tentetsang Charlie Kirk indang organization-i sen 10,000 tenla agütsü.

Florida Governor, Ron DeSantis-ia Cassidy legal

defense atema tenla agütsütsü, ta metetdaksü, ajisüaka mapang tatsüka tsünga fund bendenba shibangadok.

DeSantis-i, "Asen loktiliba nung satan atema tesem mali, aser federal sorkaria iba ya 'yimsü' ka ama magizüksüla. Taoba mapang sepai nung alisang legal defense fund atema ni-a tenla agütsütsü.

Temenen madak tajung agi takok angur. Ibaji America nunger tanela," ta metetdaksü liasü.

2019 küm IRS-i The Satanic Temple saru nungi atok, aser Arogo ka ama züngshi.

Court nung Cassidy atema attorney Davis Younts-i ken o jembitsütsü.

Satan kürakyanglu raksatsüba dak sendakba nung osangbener den jembidang Cassidy-i, "Asen sorkari Khristantem anemba mapatem ajungkettsür, anungji Khristantem amoi oa aliba nungi saaksalemdaksütsü atema ni iba ya inyak," ta ashi.

BIEMDANGANG

"Ozü atema tesep, sorak atema soraksep, nisung atema medemer yimtepba."